



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma : Tir Yimym

tiryimym@aolima

tir yimym

TAPAK 7

Bajrang Punia-i UWW dang WFI nem tenokdangba agütsütsü ajungshi

PM candidate atema Imran Khan-i Omar Ayub shim

VOL. XXI ISSUE NO. 124 (ADOK 124) DIMAPUR ROGONÜ (FRIDAY) TSÜKLAI (FEBRUARY) 16, 2024 ₹ 5.00

CS J. Alam-i department tekolakpurtem den senden amen

Dimapur, February 15, 2024 (TYO): Chief Secretary, J. Alam, IAS-i February 15, 2024 nü Administrative Head of Departments aser Head of Departments den senden ka menogo.

"Sorkar office attendance tera melenshiogo saka ano tajungba akümsü nungdaker. AHODs & HODs ajaki pei pei office tem nung attendance akangkanga reprangtsüla aser 'no work no pay' inyakym benschitsüla" ta Chief Secretary Alam-i ashi.

2023 küm department kar nung e-Office tenzükogo aser department talila nung lapoktsü. IT department ajanga department ajak website update süogo ta ashir anungji ajaki services.nagaland.gov.in amshitsü ayongzükur" ta pai ashi.

Nagaland nung service delivery tajungtiba kümdaktsütsü atema state ajungalen Aadhar 100% coverage asütsü atema sorkar sentong lir, ta Chief Secretary-isa ashi.

Paisa HODs dang Central Ministry tem nungi timtem

mangutsü atema Utilisation Certificate (UCs) agütsütsü mepishia metetdaksü.

Schemes aser programs balala atema state level aser district level Committee 115 shi lir aser bangdak department tem mapang shia sendentem amentsüla. Department ajaki February 16 matongdang Budget Session atema Annual Reports agütsütsü metetdaksür, ta J. Alam-isa ashi.

February 16, 2024 tashi nung PIMS den sendaktepa e-vigilance portal lapoktsü ta Secretary, P&AR, Akunu Meyase-i ashi.

"Mezüngbuba shilem nung vigilance aser P&AR department tem tenzüksü. Taküm March ita tashi nung tanungba department ajak nung iba mapa tenzüksü aser iba sülen departmental emails dangi circulars o notifications yoktsü" ta lai ashi.

"Departmental HODs-i taruba elections atema sodi magütsütsü aser garitem bendenba mapa tajungba inyaktsü ayongzükur" ta Chief Election Officer, Vyasan. R, IAS-i Lok Sabha election atema metetdaksü.

Transmission Division Mkg nung mapa inyaktsü

Dimapur, February 15, 2024 (TYO): February 17 aser 18, 2024 anogotem nikongdang 1:00 ako nungi 5:00 ako tashi Mokokchung Transmission Division kübok 132kV Transmission Lines ajunga shibangtsü ta consumers ajak dang metetdaksüogo.

220/132 kV Power grid (Settsu) aser 132/66/33kV

Mokokchung Sub-station tem nung mapa inyaktsü atema Shutdown asütsü ta Executive Engineer, Transmission Division Mokokchung Er. Hekaito Assumi-i ashi.

Iba ajanga Mokokchung, Tuensang, Zunheboto, Longleng aser Mon District tem nung consumer temi timtem aremstü mepishir ta Er. Hekaito-isa ashi.

Gari tulu atema Asetkong-Tsusangra lenmang shibangtsü

Dimapur, Tsüklai/February 15 (TYO): Deputy Commissioner, Mokokchung, Thsüvisie Phojo, NCS ajanga sangdong ka nung ashiba agi, Asetkong-Tsusangra (AT) Road nung Longjang aser Kilengmen tsünga Longpong apu nung deck slab kar raksar aliba ajanga iba lenmang nung jajartem lendong ajurutsüsa lir, anungji iba apu yanglushitsü mechi February 17, 2024 nungi tenzükä anogo 29 atema iba apu nung HMV (Heavy

Motor Vehicles), HGMV (Heavy Goods Motor Vehicle), aser HPMV (Heavy Passenger Motor Vehicle) senzüba nokdangtsü.

Iba mapang Light Motor Vehicles (LMV) dang senzütsü melatsü.

Area Administrative Officers den ozüng amshiba agency temi iba totuyuba meita reprangtsü aser aibelener nem ozüng agi melaba ama temerenshi agütsütsü, ta sangdong ajanga ashi.

Tanü FMR indang jembitsü senden ya NIPF-i ayongzükur

Dimapur, Tsüklai/February 15 (TYO): India-Myanmar arütsü ken o, Free Movement Regime (FMR) aser arütsü nung atsü yoktsüba onüktem jembitsü atema Nagaland Indigenous Peoples Forum (NIPF) ajanga February 16, 2024 nikongdang 4:00 ako nungi tenzükä Hotel Acacia, Dimapur nung senden ka ayongzükä lir.

states ajunga nungi CSO züngsemtemi item onük nung pei tebilemba lemsateptsü aser panel of discussion alitsü, ta NIPF sangdong ka ajanga ashi.

Iba sentong ya Dr T. Lima Jamir, President, NIPF lenisüba kübok agitsü aser sentong tenzükä Rev S. Vitoshe, Sr. Pastor, Sumi Baptist Church Dimapur ajanga sarasademtsü, ta sangdong ajangasa ashi.

Union minister Faggan Singh Mokokchung nung anogo ana munger ao



Mokokchung, 15th Feb (TYO): Union Minister of State for Steel & Rural Development, Government of India, Faggan Singh Kulaste-i Feb 14 aser 15 anogo ananü Mokokchungi arua department balala nung tokolakpur (HoDs) den Centrally Sponsored Schemes (CSS) dak sentakba nung mensem aka aser pai Mopungchuket aser Ungma yim semdanga liasü.

Pa Nagaland-i aruba ya tongtibangsa nüburtem den sensak asemstü aser Centrally Sponsored Schemes (CSS) aser terenlok mapatem koda inyak odar aji reprangi aruba lir, ta angazükur. Anogo ana amungba mapang Nagaland RD & SIRD Minister, Metsübo Jamir den Mokokchung D.C, Thsüvisie Phojo aser sorkar tulurtem aikati pa meina liasü.

Faggan-i CSS mapa balala junga inyakba asoshi pelaba metetdaksü. Paisa DC dang PMAY-G, Jal Jeevan Mission, AADHAR aser ano tanga mapatem nung balaka temulung agütsütsü tetuyuba agütsü.

Faggan-isa Feb 15 nü Ungma yim semdang aser yangji pa agizükba den repsema SHGs pur den sensaksem sentong ka Rural Assembly Hall Ungma nung ayongzükä agi. Iba sentong nung

Ungma putu yimsüsürtema densema liasü.

Sentong nung Minister Faggan-i mapang tatsüka agia jembidang, 2014 küm linük nung züngsem 2.31 crore shi Self Help Groups (SHGs) nung amtaker liasü, saka tanübo joko züngsem crore 10 shi SHGs 90 lakhs nung sentaktepa lir. Par sorkari 'Lakhpadi Didi' crore 2-3 tashi adokdaksütsü sangdongogo, anungji, iba mapatong angateta meranga inyaktsü pai ajungshi.

Paisa SHG-temi yanglutetba tapu meynatem ayoktsü asoshi khuret bena lemsatep aser DC dang nungdakbapur ajurutepa marketing atema lenmang bushitsü tetuyuba agütsü.

Sensaksem sentong nung Asst. Dist. Program Manager, NSRLM, DMMU Mokokchung, Moatoshi menden liasü, yimsüsür Imtidongba (Tatar)-i pela-a agizükba o jembi. Ongpangkong North Block Level Federation tir, Tsuktizünglai NSRLM mapa nung lai ajangshiba kar lemsatep.

Minister Faggan-isa Ungma Yimtsüngta nung Ongpangkong North, Mokokchung SHG-temi lapokba exhibition stall ka semdang. Yangji SHG-temi yangluba teka mapatem,

sütakmentak, olaangla, osettsüset, sobusolemstü, azük, kisen, potepba, aonsotsü aser chiyungtsü tapu balala repranga liasü.

Iba osangbeneri Union Minister Faggan dang tasüngdangba ka asüngdangdang, Nagaland ya India nung tongtibang state rongnung ka lir aser India sorkaria iba state ya tanungba state-tem den külemi jangyumedema odaktsünür, ta ashi.

Anogo ananü yangi amungdang Nagaland nung mapatong balala atema department ketdangsurtem den süoki ia jembiogo, anungji, koba mapa nungsa nungdak adokdir itemji reprangtsü aser terenlokji tekaraba nung ataloktsü, ta pai ashi. Anogo ananü amungba mapang Nagaland nung tesem aika tourism luyim tsütsü tajanzük aketba ajitetter, anungji, tourism ajanga Nagaland renloktütsü ngujem angur, ta paisa shisem.

Tanep telok balala den mensem mamendang pai Mopungchuket yim semdanga meta penzüa senzü aser sobaliba aser yimsüyimbong wazüka ayutsü asoshi yimdak süng agi chitetba süng mapatem aser nungo oset balala ayuba asoshi pai tenüngsang agütsü.

Nagaland nung Tobacco Vendor Licensing mapa tenzüksü

Kohima, February 15, 2024 (TYO): Nagaland sorkari Urban Local Bodies (ULBs) ajak atema Tobacco Vendor License (TVL) mapa tenzüksü metetdaksüogo.

State sorkari January 16, 2024 nung modalities ajak agizükogo aser kasaji ULBs dangi yokogo ta Department of Health and Family Welfare-i metetdaksü.

Global Adult Tobacco Survey (GATS-2) ajanga Nagaland nung

tain 43.3% tashi moko achirtem lir aser Global Youth Tobacco Survey (GYTS-4) ajanga school-i aoba tanurtem (arishi küm 13-15) 43% tashi moko achir.

Union Health Ministry-i 2021 küm state sorkar ajak dang Cigarettes and Other Tobacco Products Act (COTPA 2003) mapa tenzüksü atema tobacco vendors licensing asütsü shiogo.

Anungji Nagaland sorkari

Tobacco Vendor licensing metetdaksüogo ta department-isa metetdaksü.

ULBs ajanga moko ayokba retail shops nem permission/authorisation agütsütsü atema iba inyakym tenzükur. Cigarettes and Other Tobacco Products Act (COTPA 2003) mapa tajungba inyaktsü aser Nagaland nung moko ayoker ajak licensing policy mandatory kümdaktsütsü atema iba mapa tenzükur.

SBI-i Thizami nung Financial & Digital Literacy sentong ayongzük



Thizama nung February 14, 2024 nü Financial & Digital Literacy sentong agiba tangokba noksa ka nung tongtipang nisungtem aser sentong nung shilem agirtem angur.

Kohima, Tsüklai/February 15 (TYO): State Bank of India (SBI) Treasury Branch ajanga February 14, 2024 nü Kohima District kübok Thizami yimtsüung nung Financial & Digital Literacy and Social Security Schemes (PMSBY, PMJJBY & APY) sentong ka ayongzüküka liasü.

Iba sentong nung yimdaklir nem SB account, deposit of fund (savings account, fixed deposit, recurring deposit etc.), loan tabu balala (TL, CC, car loan, home loan, service loans, KCC etc.) aser Bank schemes (insurance, mutual funds etc) amala indang angatetdakja liasü.

Iba sentong ya Financial Inclusion Fund (FIF) ajanga yari aser NABARD ajanga ketdangsüa liasü.

Sentong nung Sosangienla Ao, Branch Manager, SBI Treasury Branch ajanga SHG account lapokba, SHG loan

agitsü atema maparen balala aser kulizüung kaket tem nüngdakba aser PMJDY account lapokba indang rasaa ashi.

Laisa government insurance aser PMSBY, PMJJBY aser APY ama pension schemes tem indanga lemsatepa liasü.

Lai Sukanya Samridhhi Account scheme indanga rasaa ashi, kong Government of India-i tetsürchanu atema saving scheme agütsür.

Mahila Samman Savings Certificate ya sorkari tetsürtem asoshi khen atema saving scheme tilaka tenzüksüba lir aser küm ana nung tain akumer, ta lai ashi.

Iba sentong nung menden ya Nagaland State Rural Livelihoods Mission (NSRLM) State Programme Manager (Financial Inclusion) Rajuselie Lhousa liasü aser Thizami yimdak SHGs ti tashi maparen

balala kanga junga inyaktetba atema pelaba lemsatepa liasü.

Pai CCs aser staff tem dang ano SHGs asem teshibanger aliba tashi itshidaktsütsü asoshi merangtsü ayongzüküka liasü.

SHGs kobaisa bank nungi loan agia ali, parnoki züngsemtem tali ajungmesotsüla aser sorkar nungi teyari agitsü atema NSRLM block staff nungi teyari meshitsüla, ta pai ashi.

SHGs aser züngsem ajaki pei indang SB Account teti amshitsüla aser 'inoperative account mekumdaktsütsüla, ta pai ashi.

Yimtsüung nung aliba SHGs indang jenjang Neisezonuo, Village Facilitator (VF) ajanga lemsatepa liasü.

SHG züngsem Nupfhü-i sentong tenzüküka sarasadem aser Thizami Village Council chairman, Medongulie Zatsu-i pela agizükba o jembia liasü.

MCCI-i kirong lendong ajurur nem teyari agütsütsü asoshi tenlabendener

Mokokchung, February/ Tsüklai 15(TYO): Tan ita tetenzüklen February 3 aonung Mokokchung Municipal Council Shopping Complex arongba nüngtem nung Mokokchung Chamber of Commerce & Industry (MCCI) nung külem shishilembartem kirong lendong agi kongshir timtema alibapurtem nem teyari agütsütsü asoshi

Mokokchung Municipality nung aliba shishilembar ajak dangi February 16 aser February 17 nü temelunger tenla bendentsüta MCCI sangdong ka nung MCCI Tir.Tsükti Longkumer aser Tongti Zülur Limalenden Longkumer ajanga metetdaktsüo.

February 13 nü MCCI sanen luden ka mena külem

adianu shishilembartem yaritsü asoshi temelunger tenlaji bendentsü telemtetba agiogo, anungji MCCI züngsem ajaki külem pur timtema alirtem nem teyari agüja nungittsü asoshi tangatetba tajung nung tenla agütsüdaktsünerta kasa sangdong nungsa metetdaktsü.

Jubilee Memorial College, Mkg nung DCA course tenzükogoo



Dimapur, Tsüklai/February 15 (TYO): Employment aser skill development jenjang tajungba kumdaktsütsü tangatetba nung Jubilee Memorial College, Mokokchung nung February 15, 2024 nü Diploma in Computer Application (DCA) course tenzüküka liasü.

Iba course agitsü atema kaketshir 29 tenüung zülüoka lir. Iba course ya Institute of Computer Science and Technology,

Mokokchung branch ajanga agütsütsü, koba Directorate of Technical Education, Government of Nagaland ajanga recognize süa lir.

Dr. Imtiwati Jamir, Principal, Jubilee Memorial College ajanga nüburtem dang iba training programme atema tenüung zülüoktsü aser skills tasen angazüktsü ajungshia liasü, koba mapa bushiba nung tongtipang kumogo ta ashi.

Pai National Education

Policy 2020 nung vocational education indang shia aliba aser tarutsü nung ibaji ajanga lenmang aisü nung tajangzük angutsü aliba lemsatepa liasü.

Matsung Pongen aser Sentirenba, Instructors, ICST ajanga computer course agitsü nüngdakba indang rateta ashidang, career aika nung ibai tongtipang kumogo ta ashi.

Iba sentong ya Tsungrosenla Jamir, Assistant Professor, JMC lenisüba kübok agia liasü.

Mokokchung DPDB senden February 19 nü amentsü

Dimapur, Tsüklai/February 15 (TYO): Deputy Commissioner & Vice-Chairman District Planning and Development Board (DPDB) Mokokchung, Thsuvisie Phoiji agi, February ita atema DPDB senden ya Rural Assembly Hall, Ungma Village nung February

19, 2024 anepdang 11:00 ako nungi amentsü. Iba senden nung Mokokchung DPDB Chairman aser district nungi elected members tema adentsü. Anungji Board züngsem ajak medema arua adentsü ayongzüküka, ta sangdong ajangasa ashi.

Private school Recognition, Up-gradation & Renewal form agütsür

Dimapur, Tsüklai/February 15 (TYO): State nung aliba private school ajunga dang Recognition, Up-gradation, aser Renewal of Recognition atema application formats Department indang website [https://education.nagaland.gov.in] (h t t p s : / / education.nagaland.gov.in)

nung upload süja lir, ta ketdangsür sangdong ka ajanga ashi.

Iba format ya March 15, 2024 tashi angutsü. Anungji apply sünüba school temi nüngdakba format ya download sür Department nem mapang latetja aliba nung agütsütsü akok, ta sangdong ajangasa ashi.

Dimapur nung Sunsilk Serum Mega Miss NE audition agi



Dimapur, Tsüklai/February 15 (TYO): Northeast nung fashion aser pageant sentong ayongzüküka tulutiba, Mega Entertainment ajanga 20 buba Sunsilk Serum Mega Miss North East atema tawa Dimapur nung auditions agia liasü.

Entertainment ajanga yanglu aser marketing nung Mega Activation lir.

Iba tetoktepba nung north eastern states ti nungi tebour tajung aser sempet balala aliba tetsür temi shilem agitsü aser Grand Finale ya ITA Machkhowa, Guwahati nung March 2 nü alitsü.

Iba auditions ajanga pageant organizers temi Northeastern states ti nungi candidates 50 shimtsü aser parnoki Sunsilk Serum Mega Miss North East 2024 atema tokteptsü.

"Taoba mapanga Nagaland nungi tetokteper tajung aika liasü aser taküma aika lir. Candidate tem tashi tait aser kanga junga renemer liasü. Yangi audition agiba atema onok kanga pelar," ta Abhijeet Singha, Founder, Mega Entertainment ajanga ashi.

Mega Entertainment ajanga pageantry yimya melenshia runners-up mamshitsü. Temaba jenjang nung aliba contestants asem nem Sunsilk Serum Mega Miss North East 2024 narokum agütsütsü. Ibaji ajanga takok angur ajak jenjang kasa nung konang tetushi angutsü.

Dimapur dang masü Mega Entertainment team ajanga Kokrajhar, Guwahati, Shillong, Agartala aser Gangtok nunga auditions agitar.

Takok angur asemprong shiai sen 1,00,000 alang sempet angutsü. Iba den külemi parnoki dangaleni aotsü maongka angutsü, Mega Entertainment nungi professional representation alitsü, brand engagements, shoots, fashion sentong balala nung shilem agitsü aser Life's Purple nungi maongka balala agütsütsü.

Shia aliba tesemtem tonga maruteter candidates asoshi online applications agizüktsü. Aser item amala candidate temi audition aser registration atema +91 84040 93936 den tongteprateptsü akok.

Iba pageant indang Title sponsor ya Sunsilk Serum, Cosmetic partner ya Dazller Eterna, Fashion partner ya Butterfly Clothing and Accessories aser Hospitality partner ya Hotel Daaysco Oley Allo alitsü.

Mega Miss North East ya fashionpreneur Abhijeet Singha ajanga tentetba lir. Iba ya Mega



February 15, 2024 nü New Delhi nung Security Printing and Minting Corporation of India Ltd. (SPMCIL) indang Foundation Day anogomong sentong nung Union Minister for Finance & Corporate Affairs, Nirmala Sitharaman den tangartem tangokba noksa nung angur.

Supreme Court-i Electoral Bond scheme agientsüogo

New Delhi, February 15 (Agencies): Brihostibarnü Supreme Court-i electoral bond scheme ya linük temzüng nung aliba pei tebilemba sadema jembiba aser information temeden anema lir, ta shia iba scheme agientsüogo.

SC-i State Bank of India (SBI) dang küm trok scheme ya ajanga yimtenren party temi sen kwi agizük aser tenla agütsürtem tenüng Election Commission nem metetdakjang, ta tuyuogo.

Chief Justice, D Y Chandrachud leniba nung judge pongui akümba Constitution bench kati SBI dang, March 6, 2024 anogo tashi nung yimtenren party temi agizükba electoral bond osang tejangja metetdaksütsüla, ta tuyuogo.

Supreme Court-i, Election Commission-i March 13 tashi

nungbosa parnok indang official website nung SBI-i agütsüba osangji metetdaksütsüla, ta tuyu.

Justices- Sanjiv Khanna, B R Gavai, J B Pardiwala aser Manoj Misra nungera densema aliba Bench-isa iba scheme anema benokba ken o angadamba sülen oshidang balala ana agütsü.

Chief Justice of India-i, iba scheme ajanga linük temzüng nung Arlla 19(1)(a) kübok pei tebilemba sadema jembiba temeden alema inyaker, ta ashi.

Paisa, iba scheme kübok tenla agütsürtem maitsü mimshiba ajanga voters indang information temeden alema inyaker, ta metetdaksü.

Supreme Court-isa, SBI-i electoral bonds agütsüba anentsüla aser April 12, 2019 nungi tenzüka tanü tashi alizükba

bonds osang tejangja Election Commission nem agüjang, ta tuyu.

Congress lenir Jaya Thakur, Communist Party of India (Marxist) aser NGO Association for Democratic Reforms (ADR)-i yaküm October ita nung electoral bonds scheme anema temepishiba ken o balala pezü benoka liasü.

SC-i iba obendang agütsüba sülen temepishiba ken o benokertem aser parnok indang lawyer temi, iba obendang ya democracy aser inyakyim teladak atema takok lir, ta metetdaksü.

2018 küm January 2 nü sorkari iba scheme sangdonga liasü; yimtenren party tem nem senotsü tenla agütsüba inyakyim teladak asütsü atema iba scheme benoka liasü.

National Conference-i LS election nung tangar den meloktepi tokteptsü

Srinagar, February 15 (Agencies): Brihostibarnü National Conference (NC) Tir, Dr Farooq Abdullah-i, taruba Lok Sabha election nung par party-i tanga party tem den meloktepi tokteptsü, ta metetdaksü.

Opposition teloktep INDIA nung densema aliba party aikati pepei state nung tangar den meloktepi tokteptsü sangdonger.

Brihostibarnü Srinagar nung osangbenertem senden nung jembidang taoba mapang Jammu & Kashmir nung Chief Minister, Dr Farooq Abdullah-i,

"Ni langka jangjashitsüdi, National Conference-i election nung tangar den meloktepi tokteptsü. Onoki election atema tangar den teloktep meyanglutsü," ta metetdaksü.

"Ni Jammu & Kashmir nung kobi melii election agia angur aser Parliamentary election den külemi assembly election-a agütsüa akok," ta pai metetdaksü.

Enforcement Directorate-i pa jaokba dak sendakba nung pai, "ED-i jaokba ama ni aotsü. Parnoki National Conference samatsütsü makok; parnoki

jaokyonga ni metsübur," ta ashi.

Supreme Court-i Electoral Bonds agientsüba dak sendakba nung tasüngdangba ka langzüdang Farooq Abdullah-i, "Party temi ibaji agizükettsüla, inyaksüla aser parnoki sen kwi angu, kong nungi angu aser senotsü kwi aliar ashitsüla. Politics nung sen ajanga tongti shilem agiba aser yimtenren party tem indang rongsenji nüburtemi meteta alitsüla. Election matongdang item osang sangdonga nüburtem nem metetdaksütsüji kanga tongtibang," ta ashi.



February 15, 2024 nü Gandhinagar nung BJP National Tir, JP Nadda-i Rajya Sabha election nung tokteptsü atema nomination file asüi aodang tangokba noksa nung angur. Kasa noksa nung Gujarat Chief Minister Bhupendra Patel den part lenirtem angur.

Tanü aluyimertemi 'Gramin Bharat Bandh' ayongzüka agitsü

New Delhi, Tsüklai/February 15 (Agencies): Tang aluyimertem union 200 dak temai 'Delhi Chalo' march ayongzüka agiba mapang Samyukta Kisan Morcha aser central trade unions nati senteper February 16 nü linük tesem ajaklen longkak aittsü atema ayongzükogo.

SKM-i aluyimertem organisation ajak dang linük tesem ajaklen 'Gramin Bharat Bandh' nung shilem agitsü mepishia metetdaksüogo.

Anogo piyong aluyimertemi longkak aitba sentongji anepdang 6:00 ako nungi tenzüka nikongdang 4:00 ako tashi agitsü, ta osang jangjaogo.

Linük tesem ajaklen longkak aitba ajanga gari aser train ajanga osettsüset belenba kongshitsü, aluyimba maparen kongshitsü, MNREGA mapatem kongshitsü, nija office tem, yimtsüngtem nung dokantem, yimtsüngtem nung industry aser service sector

rejutem kongshitsü. Longkak aiter aluyimertem pusema lokti nung lenirtem aser artist temi külem sangdong ka agütsüogo, aser iba sangdong nungji nisung 34-i sign süa lir.

Sangdong nung sign süa alirtem rongnung economist Prabhat Patnaik, historian Irfan Habib, economic historian Nasir Tyabji, cultural activist Anil Chandra aser nungtugu journalist P Sainath nung densema lir.

Sangdong nungji yamai zülua lir, "Central Trade Unions (CTUs) aser Samyukta Kisan Morcha (SKM) nati longjemer February 16 nü Industrial/Sectoral Strike aser Grameen Bharat Bandh ayongzükogo. BJP-i aniba sorkari corporates pusemba aser nüburtem anema mapatongtem benokba anema takoksa angur aayangertem longjemdaksütsü aser amalitepa raratsü atema parnoki longjemogo."



February 15, 2024 nü Jaipur nung osangbenertem senden ka nung Rajasthan Congress Tir, Govind Singh Dotsara aser Congress party's incharge for state, Sukhjinder Singh Randhawa nati longkak aiter aluyimertem pusema jembidang tangokba noksa nung angur.

India aser Qatar tesendaktep tashi taitba dang kümdar: PM Modi

Doha, February 15 (Agencies): India-Qatar tesendaktep tashi taitba dang kümdar, aser linük anapronglai tarutsü nung sector aika nung amalitepa inyaksü asoshi lenmang bushir, ta Brihostibarnü Ato kilonser, Narendra Modi-i metetdaksü.

Qatar Emir, Sheikh Tamim bin Hamad Al-Thani den senden amenba sülen Modi-i X ajanga, Emir den senden kanga junga menogo aser linük ana tsüngda tesendaktep reprangshiba den külemi sector aika nung taliba amalitepa inyaksü atema o lemtepogo, ta metetdaksü.

Lenir anati linük ana tesendaktep tajungba akümtsü atema jembiba den külemi shishilembaba, investment, energy, space, sobaliba aser nüburtem tsüngda tesendaktep densema sector aika nung taliba amalitepa inyaksü atema jembiba.

External Affairs Ministry nung otongdar, Randhir Jaiswal-i, Modi aser Emir na senden kanga tajangzük kaa menogo aser Ato kilonseri Qatar lenir dang Qatar linük nung India sensotem ajungtsü atema inyakba asoshi pelaba lemsatep,

ta metetdaksü. Ato kilonser Modi-i anogo ananü United Arab Emirates semdangba sülen Bodhbar aonung Qatar yimtiba, Doha tonga ao.

EAM otongdar Jaiswal-isa 'X' ajanga, "Tenati regional aser international onüktem nunga tebilemba lemsatep," ta metetdaksü.

Bodhbar aonung Modi-i Qatar Ato kilonser, Sheikh Mohammed bin Abdulrahman Al Thani-a ajurua liasü. Abdulrahman-i foreign ministry-a repsema abener.

Yaküm December ita nung Dubai nung COP28 Summit aliba mapang nunga Modi-i Qatar Emir den jurila senden mena Qatar nung aliba India sensotem atema o lemtepa liasü.

India-i LNG teimtiba agiba linükji Qatar lir. India nungeri LNG (Liquefied Natural Gas) agiba shilem 48 bo Qatar dang nungi lir.

India nunger Petronet-i contract tasen yanglushia 2029 küm nungi tenzüka küm 20 tashi India-i küm shia Qatar dang LNG ton million 7.5 alitsü tezüngzüktepi agiogo.



TIR YIMYIM YIMOBILEM (EDITORIAL)

DIMAPUR ROGONÜ, FEBRUARY (TSÜKLAI) 16, 2024

Yimsüsürtemi semdangbaya junger

Mapang talangka center nungibo yimsüsür shingaia Mokokchung-bo tangu danga mangudangi aruba tang Steel & Rural Development minister Faggan Singh Kulaste Mokokchung tonga aruba yagi Mokokchung district purtemi akhidang Delhi nungi yimten yimsüsürtem aruba bilemteter alitsü. Atangji, meimlai lia tang amaji center nungi Union minister asen lima tonga arubaji asenok asoshi temoatsü aser tajangzük anguba mapang asütsü. Shin o nung ashi ama, angu nung dang amanger, anungji yimsüsüri nübortem alidak yimtak yimtsüng tonga oagi nübortem ajurua jembidangji parnok tia aser nungdak reprangteter alitsü imlar. Atangji, yimtsüngsa asüyonga Mokokchung anasa aliba yimtsüngtembo town den kasasa renloker alitsü, anungji yimti yimdong aser kiojen ajakji tajung dang angur alitsü. Iba jagi Union minister temulung chir alitsü südi. Ajisüaka, Mokokchung district kübok yimtsüng aika nung ano süra kidang alir aika lir aser gari lenmanga junga maliba yimtema lir. Aji oda, yimtsüng aika center nungi relief jang ya meyok nungbo ayawara agi timatemtsüba tia nung lir. Akhidangbo yimtaklirtemsa temerangba inyaka takar küma ali saka tanü asüngbo yimtaklirtem dang nungibo town nung alirtemang teinyakba aser temerangba kümogo. Aji oda, yimtaklirtem aika anogo shia kechalenia moi kecha meinyak kazüdang, town nung alirtembo chiyongtsüa mapang mangu inyakba purtem aika lir. Ibjang shitakba asen lima tensa tia asütsü aser aji Union RD minister jagi metet nung dang, yimtaklirtem nübo aser mapang amajok nung meindokdaksüi mazüngi mapa inyaka alitsüsa lenmang teyutsü aser sentong renemtsütsü. Aji oda, Union minister arudang asenokbo kecha maka ser nung aika aka ama asen süoshia tajungtiba semer, sempet tajungtiba agüja anepalur yokbaji asenoki parnok nem tai tangatetba ka agütsür asütsü akok. Anungji, asen sobaliba tajungji parnok nem agatetdaksütsüla. Atangji, khi khi luben Delhi nungi Union minister aruba jagi asenoki sayunüba aser yaridaksünüba yim, nübortem aser tesemtem mesayutetsü, ajisüaka itemjibo Nagaland nung adoker MLA-tem mapa asütsüla. Asenok dangi Union minister arung taru, center nungibo ita shia state shia dangi Union minister yoker, anungji iba jagi center o state na tesendaktep tajungba yanglur aser mulung melemi aliba shisatsü oa adoker. Iba amaji state nung MLA aser ministertem-ia government sentong aliba mapang dang masü mesüra tongti tesemdang asütsü jaokba anogo nung dang masü saka ita shia pei constituency nung yimtsüng kabosa semdangtsüla. Idangji, pei constituency nung aliba mozü kitem, schools aser government office-tem semdanga shisalemsateptsüla. Iba jagi pei constituency, pei district aser pei state renlokba nung asentenshi tulu adoktsü. Nübortem yaritsü atema Delhi nungi mesüra Kohima nungi parnok account nung sen yokbaji masü mesüra Local Area Development sen agi temeim lemsar ama mapa meinyaki sen agizüka agitsüsa taila sentong yanglutsübaji masü, yimsüsüri pei nübortem alidak tonga oagi parnok ki aser parnok lu nung anenzüker sensaksem tenzükba nungi terenlok mapatem asangsang nung tenzüksü. Idangjibo mapa meinyaki agitsü sen agütsüyonga shingaia magitsü aser kechalenia moi kidang dang chiajema mungang ta asüyonga mamungtsü, anungji nisung ajak mapa inyaker akümstsü. Ashiko, idangjibo Polling anogo nunga pei vote enoktsürbo alui aotsü.

OLEMSABANG

SARASADEM TESEP KOMA ASÜ NUNG TAJUNGBA SÜLA

Rev. Dr. Limatula Lkr.

(Yashi adok nungi...)

- * Prayer centre nung inyakertemji külen tia ashir ama, akhi Khristan yimli marudang Arasentsür dangi tia asüngdangi aoba yimya mesükba ka Sarasadem Tesep nung inyakdaki. Iba inyakyim ya traditional primal religion yimsü nung aliba to revive asür asü ta talisa temesüng nisungtemi (western churches) tang sashia research agidaki. Is it a revival of primal religious traditions which was suppressed by Christianity or part of Indigenous contextual Christian practice? Mesüra iba yimya ya tribal Christian tamangba yimya ka, asen context nung adoker? Inyakyim nungji temezünger arasentsür mapa den ken ashitsü nungbo mesükteper amai. Saka Tsüngrem, Tanela Temeshi tenung nung inyaker ta kuli lirji iba ya Tsüngremer sayatenya mapa ta nübortem nanga agizüker.
- * Tsüngrem nungi sayatenya inyaksü imla sarasadem. (Bible in hand and the miracle on the other). Tarutsü ataloktsü alibatem shiner aser tesüiba nung kechi asü iba indangjia ashitsü akoker. Anungji sarasadem tesep kiburji Tsüngrem amai kümdaktsür aser toshir. Arogo nung Pastor dangi mo-i Prayer Centre bushia nisung aika tia metettsü aser tanebtsü bushia sendener.
- * Prayer Centre nungji lumia hopta ka mesüra ana-ase, ita junga kar asoshibo lumitsü akhanger. Lumiba ajanga Tanela Temeshi-i takum nung mapa inyakba metettsü, lumia sarasademba ajanga taküm merükteta meshiteta sarasadem, mojing aser temenen tanela ajak aridokdaksür. Anungji sarasadem tesep ki bushia lumia sarasademtsü asoshi aor.
- * Prayer Centre nung ya sarasadem dang masü saka Bible study aser tekulem sentep-a dena agir. Anungji iba ya tenla kidang tekulem agiba yimya mesüka inyaker.
- * Prayer centre nungji theological perspective ana amshiba angutsü: (i) theology of prosperity, (ii) theology of intervention. Tanela Temeshi ain dak ajemdaker iba tashi ajanga timtem ajakji nokdangtsü akoker ta sashi sashia tanela tetuyuba agutsür. Prayer centre nung inyaker kibur aser counsellortemji interventionist, Tsüngrem ama kümdaktsür, miracle performer-tem ama toshir. Anungji yamala telungjemji arogo tekülem sentep dang nungi kanga agi tesapuba akümer. Ano Tsüngrem dang meranga rongsen tenlaba iba yari Tsüngrem nungi ali rongsen temoatsü tali züendaktsür ta asüba tesayuba sashia sayur. Ibai sarasadem tesep nung dang masü saka arogo tesayuba nunga lir. Ibayongji ochi shia bendenba, ochi meshi-i bendenba ajak nungi nübortem meranga tenla abener. Nübortem tenla magutsü nungbo koda sür sarasadem tesep yamai aotsü?
- * Sarasadem tesep kiburtemji züngdangyonga ora tetsüri lapokba teimba lir. Tanga bendang lima nunga sarasadem tesep kiburtemji tetsür teimba angutsü. Iba yagi arogo asoshi kechi tetuyuba agütsür? Arogo inyakyim yayim (structure) nung tetsürtem sadema meinyaktetba tuyur, arogotsür rongnung dangashi arogo yinti nung ano tetsürtem sadema meinyakteter. Anungji prayer centre nungji tetsür-tebur ajaki külemi pei akokba yari shilem agitsü leman lapoktsür. Iba yagi arogo lenisüba nung tetsürtem nem tim shilem (leadership and partnership ministry) magütsüba tebilemstsü tuyur asu?
- * Ano sarasadem tesep ki nungji kibur dang masü, saka counsellortemji teimba ka theology mazüng, general education-a junga manguba rogo aika lir. Saka tanela sempet aka nungji (qualification) parnok yamala centre nungji tenzük. Takar, tular, sensaker, tilar ajaki parnok tsungdangi aor, aser sarasademdaksür, Bible study aser counselling agütsür. Iba nungji Lai ratet aser tesayuba agütsüba nungji timtem aiben adoktsü akok, kechiba sura Lai ratetba nungji tanela lenisüba denji Laishiba tapak angateta azüngtsübaji tongtibang lir.
- * Ashiko sarasadem tesep ya kar asoshi employment angudak ka asütsü akok. Amanger, ajaki Tsüngrem tanela tetuyuba nung centre lapoker ta kuli tejangja agütsütsü sudi, saka jungjunga shisadangra iba ya industry ka, self employment amai mekumdangra asen lima nung lapoka aotsü. Theological college lapokbaji fashion ka ama ken mapang ka nung lapokogo aser tang prayer centre lapoka aor.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Evangelical lenirtemi Israel semdanga nüburted den tejashi lemsatep



January ita tatebanglen International Christian Embassy Jerusalem solidarity mission tour nung shilem agir Khristan lenirtemi Israel kübok Kibbutz Nir Oz semdanga Hamas teloki amakdang teraksatsüba asadanga mapang tangokba noksa nung angur.

February 15, 2024: America nunger Anglican putir, Gerald McDermott-i January ita tatebanglen mission telok ka den külemi Israel semdanga yaküm Hamas teloki amakba atema Israel nüburted den tejashi lemsatepogo.

'Christian Zionism and meaning of Israel to Christianity' indang kaket ana zülusang aser taoba mapang theology professor, Gerald-i tamalen-a Israel 22 ben tashi semdanga liasü.

International Christian Embassy Jerusalem solidarity mission tour nungji alima tesem balala nungi pastor tem den külemi Gerald-i Israel semdanga sülen pai-i, "October 7 nü tatalokba video aika ni repringogo. Jaratem nung azü aser injang agi khapokba tapok aika lir aser tanur kazütsü osettem lir," ta metetdaksü.

Paisa, "Onoki anguba kulitemji Satan-i Yihuda nunger sempaba temaitsütem liasü. Satan-i Yihuda nunger sempar, kechiyong Tsüngremi Yihuda nunger meimer ta satan-i meteta dang lir. Hamas nunger melungsentsü nung satan lir aser satan-i parnok ajungshir," ta metetdaksü.

International Christian Embassy Jerusalem-i ayongzükba mission tour nung shilem agir Evangelical lenirtemi Gaza arrtsülen aliba yimti, Sderot-a semdanga liasü. Tesüiba küm 20 tsüngda Hamas teloki rocket amshia iba yimti aiben maakogo.

Mission telok jagisa northern Israel semdang. Iba region nung Lebanon nungi Hezbollah teloki missile aika amshia amakba ajanga yangji aliba Israel nunger meyrjang aika jenshiogo.

Israel semdanga mission nung shilem agirtemji linük 18 nungi Evangelical lenirtem liasü.

Hamas teloki amakba ajanga takoksa angurtem aser tang tashi Hamas teloki pua aliba kinüngertem kari Evengelical lenirtem den parnoki ajangshiba lemsatepa iasü.

Israel aser Hamas tsüngda rara tenzükba sülen nungi alima tesem balala nungi Israel

semdangertem kanga ajema kümogo; Israel tashi senzüba tayimtsü kanga ajema kümogo aser raliwalirtem anenzükba hotel aika nung takoksa angurtem jenoka lir.

"Ajisüaka tesüiba ita ana nungbo Khristan telok aika Israel-i meyipa aruogo," ta Knesset Christian Allies Caucus nung Director, Josh Reinstein-i metetdaksü.

Yaküm October 7 nü Hamas teloki Israel amakba anogo nungi tenzükba tanü tashi nung Evangelical Khristantemi Israel nung takoksa angurtem yaritsü atema melungtet telok balala nem dollar sen million aika tenla agütsüogo.

"America-i dang masü saka alima tesem balala nung Khristantem aikati Israel pusemer. Africa, Asia, Europe aser Latin America nung Khristantemi Israel pusema rally aika ayongzükba agiogo. Talisa US nungbo Evangelical

Khristantemi Israel pusemstü atema yimsüsürtem ajungshir," ta Josh Reinstein-i metetdaksü.

Israel semdanga mission telok nungji Corona, California nung aliba Lisa Powell Ministries International tenteta aser Pastor Lisa Powell-a densema liasü. Lai tang agi 38benbuba Israel semdangogo.

Mission telokji Yirusalem nung aliba hotel ka nung anenzük, aser iba hotel nungji takoksa angur kibong aika jenoka aliba ajanga parnoki takoksa angurtem den sensaksemstü atema maongka angu.

Pastor Powell-i, "Kibong rangben hotel takdang ka nung anenzük. Parnok kanga aoksaogo saka parnok külemi kibong ka ama aliba ajanga parnok tashi itta dang lir. Shidakba agibo parnok refugee camp nung lila, ajisüaka Israel sorkari parnok yarir," ta metetdaksü.

ANOGO ABEN TSÜNGREM DEN

Taküm O

Aser parnok o parnok na jembitepa ashi, lenmang nung pai asenek den jembia Laishiba ratetta sayudang, asenek temulungjang marong ama ?
Luke 24:32

Yisui Pa nendaka bushir den aden. Nisung ana Emmaus lenmang nung Yirusalem nung atalokba süngmanga jembitepa jaja. Parnok anogo nung atalokba parnoki angatetogo ta bilem saka Yisu asüba ajanga Tsüngremi parnok lima nung inyakba mapa parnoki mangatetti aküm. Yisuji Messia ta parnoki imla saka Pa asüba ajanga parnok süngmang aser tasü meiti aküm. Parnoki telangzüba nungdak.

Tsüngremi temulungjang repranger aser Pai mulungba ochi shia bushir Pa chirtem Pai metetter. Yisui item nisung anasa ao , parnok den jaja aser Laishibai kechi ashir aser kechi atalok aji angatettsü parnok temulungjang lapoktsü. Yisui jembidang parnok temulungjang nung arong. Yisui Lai nungi jembidang parnoki kechi ajangshi iba den medemdangdang, parnoki Tsüngrem O angar ta parnok mulung nung metetta aru. Parnok terata sama, tepela agi asüng aser parnok tembartem den ochibaji lemsateptsü meyipa aru.

Na tensa tia agi ratadakja lira, Yisui item nisung ama dang inyakba ama Pai Laishiba ajanga ne terata ajak angatetdaksütsü. Nisung tsütsü nungi tiaji tebangkatsü asütsü aser tasü maitsü asütsü aser tasü maitsü asütsü akok. Laishiba ochibaji angatettsü asoshi Yisu atenba nungdaker. Ne tensa mapang agi na ratadakja lir asü? Yisui anguba ama angutsü asoshi na Yisu nungdaker. Nai ken Yisu nungi angashira na item nisung ana ama ya akümstü, Tsüngremi kechi inyaker iba nung adentsü aser tepela agi nai ajuruba Tangartem den lemsateptsü.

Telangana nung Arogo kimong mechi nung Khristantem dak azük



February 13, 2024 nü Telangana state nung Ranga Reddy district kübok Janwada yimdak Hindu nungertemi amakdang yiruba Khristanem sorkar hospital ka nung amongdang tangokba noksa nung angur.

February 15, 2024: India kübok Telangana state nung Arogo ka meyong kimong dak sendakba nung mangatettep adoka Hindu nunger telok kati Khristantem amakdang Khristan 21 yiruogo, ta Methodist Arogo nung lenir kati metetdaksü.

Methodist Church of India nung tongti, M A Daniel-i, "February 13, 2024 nü Telangana state nung Ranga

Reddy district kübok Janwada yimdak Hindu nungertemi amakdang ozü züngsem 21 yiruogo," ta metetdaksü.

Yimdak aliba Methodist Arogo Tenla ki anasa gari lenmang ulushiba maparen dak sendakba nung iba mangatettep adoka liasü.

February 14 nü Telangana state yimtiba, Hyderabad nung osangbener den jembidang Bishop Daniel-i, "Khristan 12

sorkar hospital nung mongdar aser parnok asempo kanga mejungi yirua lir. Khristan 9 bo hospital nung first-aid agiba sülenbo kidangi ogo," ta metetdaksü.

Paisa, "Iba mangatettep ya komaser adokar ni osang tejangja memetet, ajisüaka police-i bushisüngdanga ajanga kuli tejangja metettsü," ta ashi.

Gari lenmang ulushitsü atema Arogo dang masüngdangi

Arogo meyong li agisemstü merangba ajanga Khristantem kanga jashia liasü, ta Arogo lenir kati metetdaksü.

Iba mapang nungji yimdaklir 150 dak tema iba tesemji tonga aruba ajanga ano tensa tamajungba dang küma lung agi ontepa liasü.

Iba tatalokba dak sendakba nung Police-i ken o ka benokogo, ajisüaka tang tashi nungbo nisung shinga mapu, ta osang angazüker.

Police-isa tangartem dang iba yimtsüng jagi maotsü tetuyuba agüja lir, ta Arogo lenir kati metetdaksü.

Bishop Daniel-ia hospital-i oa yirua alir Khristantem semdangogo.

Nütsüng million 35 aliba Telangana state nung nütsüng shilem 20 shibo Khristantem lir. Tang iba state nung Congress sorkar lir.

Congress-i Telangana nung Khristantem densema minorities nem tekümzükba agütsür ta ashir, ajisüaka state nung mapang shia Khristantem anema inyaker.

AO OSHI ANGAZÜKDAK:
TANÜ ANGAZÜKTSÜBA OJANG



Shizük

(v) jangratema, temlung süa aliba (worth living and doing)

* Asenokbo alima nung taso shizüka alir.

Shizükshira

(n) Shitokshirar külen anüngzükba tzü (waste water)

* Nisung aikati shizükshira tzü agi gari shidoker.

OLONG PAITEP # 6699

	1				2	3			
4			5						6
						7			
	8								
	9			10				11	
							12		13
14									
						15			

TIPLÉN

- 2. Sü jeplok - (4)
- 4. O agi merenshi - (5)
- 7. Ayongküm li - (5)
- 8. Chiyungtsü mapang süiadok - (4)
- 9. Tsüngrem den jembiba - (9)
- 12. Saklok - (4)
- 14. Samaba mebushitet - (5)
- 15. Mejanga onü - (5)
- 16. Tzü shiruru ka - (4)

LANGTSÜNGLEN

- 1. _____ i - (4)
- 3. Kasa masü - (6)
- 5. Nüchi masü - (5)
- 6. Tashi endok - (5)
- 9. Langtem - (5)
- 10. Anü malidang - (6)
- 11. _____ kibur - (5)
- 13. Tebur tembar tsüngda jatepba - (4)

OLONG PAITEP # 6698 TELANGZÜBA

TIPLÉN :

- 1. Semtu, 3. Lepko, 5. Bilem,
- 8. Ulu, 10. Tsüngpang,
- 11. Tesangwa, 13. Aoksa,
- 15. Putir, 16. Yipru.

LANGTSÜNGLEN :

- 1. Sayu, 2. Teb, 4. Kimong,
- 6. Lungkak, 7. Milak, 9. Zünga,
- 10. Temopu, 12. Walu, 14. Ali.

NAI-A YA METETTER MA

Prime Minister Narendra Modi-i Dubai nung World Governments Summit nung adentsü atema aodang February 13, 2024 nü Burj Khalifa nung 'Guest of Honour - Republic of India' ta ojangtem zülur light tsüklök. PM Modi-i UAE President Sheikh Mohamed bin Zayed Al Nahyan den



ajurutepa senden menogo aser idangji energy, infrastructure, investments dak sendakba MoU 10 nung sign sütep. Dubai nung Crown Prince Sheikh Hamdan bin Mohammed bin Rashid Al Maktoum-i Burj Khalifa nung Indian wako aser World Governments Summit logo enokba noksatem lemsatepa liasü.

IIM Shillong-i Ministry of DoNER aser NEC den MoU nung sign sütep



Guwahati, February 15, 2024 (Agencies): Dr. APJ Abdul Kalam Centre for Policy Research and Analysis-i IIM Shillong den maneni inyaksema aotsü atema NEC Shillong, IIM Shillong aser MDoNER tsüngda Memorandum of Understanding (MoU) ka nung sign sütepogo.

Joint Secretary MDoNER Angshuman Dey aser Secretary, NEC Moses K Chalai aser Director, IIM Shillong Prof. D.P Goyal nungeri MoU nung sign sütep.

Iba sentong nung Secretary, MDoNER Chanchal Kumar aser DoNER, NEC o IIM Shillong ketdangsurtem aden.

October 15, 2026 nü IIM Shillong aser Ministry of Development of North Eastern Region (MDoNER) aser North Eastern Council tsüngda MoU ka sign sütepba ajanga Dr. APJ Abdul Kalam Centre for Policy

Research and Analysis tenteta liasü.

Iba ya North East India state tem yaritsü atema state-of-the-art centre ka kümdaktsütsü nükjiding liasü.

"Asür President Dr. A P J Abdul Kalam senmang aser pai terenlok alizüing ayuba atema kanga pelar" ta Director, IIM Shillong Prof D P Goyal-i ashi.

Dr Kalam Centre-i kümtem süia arudang mapa tajung aika inyakogo. MoU atsülangba ajanga tongtipang agency 3 tsüngda tesentaktep akangshitsü aser northeastern region renlokba nung yaritsü, ta Prof D P Goyal-isa ashi.

"Iba Centre ya imlaba ama tenzüktetogo. Centre-i maneni policy tem yanglutsü aser centre sorkar latetja aliba inyakyim sülen anidaktsü ayongzüiker" ta Secretary NEC Moses Chalai-i ashi.

"Dr APJ Abdul Kalam

Centre ya NEC ajanga Ministry of DoNER-i teyari agütsür. MDoNER-i iba centre ya tajungtiba nung lapoktsü ayongzüiker" ta pai ashi.

Secretary, MDoNER Chanchal Kumar-ia centre moatsü aser Northeast nung think tank tongtipang ka akümtsü imlar ta ashi.

Dr. Kalam Centre ajanga North East Development Fellows ka tenzüktsü nungdaker. Iba ajanga Northeast nung ketdangsubaren aser sorkar tajungba akümtsü, ta Chanchal Kumar-i ashi.

Paisa MDoNER ajanga akokba tashi centre renlokba nung yariteptsü.

Dr. Kalam Centre-i Training and Development, Research and Consultancy, Policy Advocacy, Knowledge Dissemination aser Civic Engagement maparen inyaktsü.

Tripura CM-i Rs 5 lakh health insurance scheme tenzüktsü

Agartala, February 15, 2024 (Agencies): Tripura Chief Minister Prof. Dr. Manik Saha-i Brihostibarnü Chief Minister Jan Arogya Yojana (CM-JAY) tenzüktsüogo.

Iba ajanga Tripura nung kibong lakh 4.15 nem Rs 5 lakh indang health insurance agütsütsü.

"Chief Minister Jan Arogya Yojana ya Ayushman Bharat mesüra tanga governmental insurance scheme nung madenba nisungtem atema

tenzüktsü. CM-JAY ya nisung ajak atema health assurance agütsütsü mera ka lir aser beneficiary temi Rs. 5 lakh tashi medical benefits angutsü" ta CM Dr. Saha-i ashi.

"Prime Minister Narendra Modi-i tenzükba Pradhan Mantri Jan Arogya Yojana ajanga Tripura nung kibong lakh 9.75 nungi kibong lakh 5.12 shi ajangzüiker" ta paisa ashi.

"Tesembalala nungi nisungtemi kü dangi health dak sendakba tebilemstütem lemsateper. Onoki

akokba tashi yarir saka 100% saturation level atongtsübaji kanga tasak. PM-JAY den mesüktepa Chief Minister Jan Arogya Yojana-i kibong lakh 4.15 shi yaritsü tenzüker" ta Dr. Saha-isa metetdaktsü.

Prime Minister-i tuyuba ama onoki kasa inyakyimtem lateta lir. State sorkar nung mapa inyakertemi tang agiba medical allowances aser medical reimbursement agienba sülen CM-JAY-2023 scheme nung dendaktsütsü" ta paisa ashi.

Manipur nung Army aser police-i prangpong-injang aika ngutet



Imphal, February 15, 2024 (Agencies): Manipur nung Indian Army aser Manipur police-i mita aodang prangpong injang aika ngutetogo.

Osang tejangja angazükba sülen Kangpokpi aser Bishnupur district tem nung mita aodang prangpong-injangtem ngutet.

Kangpokpi district kübok Khoken yimtsüng nung parnoki country-made mortar, country-made carbine machine gun, country-made Pompei guns, grenade aser injangtem ngutet.

Bishnupur district kübok Dampi ridge nunga Indian Army, BSF aser Manipur

police-i six-inch country-made mortars with eleven rounds, 7.62mm SLR rifle, 9mm pistol, 12 bore single-barrel gun, ammunition, grenades aser tanga osettem ngutet.

Prangpong-injang ajak Manipur police ket nung agütsüogo.

PM candidate atema Imran Khan-i Omar Ayub shim

Lahore, Tsüklai/February 15 (Agencies): Taoba mapang National Assembly nung speaker inyaka alisang Asad Qaiser-i Bresthostibarnü ashiba...

Adiala Jail nung yua alisang party tekolakba den senden ka amenba sülen Qaiser-i iba osang ya sangdong. Anogo ka tejakdang PTI leniri tang yimten...

Election sülen ang tezüngzüktep yanglur asünung, danga party tem ama PTI ya sorkar kumtetner. Imran-i aniba party nungi independent candidate temi tawa agiba...

Khyber Pakhtunkhwa nung Jamaat-i-Islami den külemi coalition sorkar ka kumtetsü ta parnoki ashi. Ajisüaka mapang tatsüka lir Jamaat-i-Islami lenir...

Bresthostibarnü Adiala Jail kima osangbener den jembisang Qaiser-i ashiba agi, Imran Khan-i PTI central general secretary Omar Ayub Khan ya ato kilonser atema candidate ka...

"Tanabuba nung tila-tanur temia election nung tim masü mapa inyakba aser onok indang vote auyaba meteta lir, nikongdang tashinung Khan-i linük ajunga nung longkak aittsü anogo sangdongtsü," ta Qaiser-i ashi.

Election results anema longkak aitba political paryu ajunga, talisa Maulana Fazlur Rehman'er JUI-F, Awami National Party aser Qaumi Wattan Party den jembishinütsü künem mapa nungloksü ta pai ashi.

"Onok külemi sentong ka yangluner, kechiaser ibai Pakistan puti otsü nung election tamajungtiba liasü," ta PTI leniri ashi aser February 8 nü agiba election ya linük sasep aser international jenjang nunga tejangja masü ta aitsü.

(Maneni tapak 8 nung...)

Tseminyu Town Ao Baptist Arogo, Dist : Tseminyu, Nagaland PELABALEMSATEPER

Shirnokisa ozü Arogo Golden jubilee asoshi tenla tajung aria bilema jubilee takok ngütetsüsa tenlaogo, nenok ajak dang arogoi kangasa pelar. Nenok kija aser kibong maneni asen teyanglur Tsüngremi moajangma.Tenla agütsür tenüny yamai adoktsür :

Table with columns: SL No, NAME, VILLAGE, AMOUNT. Lists donors and their contributions to the church jubilee.

Russia nung Belgorod shopping centre ka amak

Moscow, Tsüklai/February 15 (Agencies): Russia nung Belgorod yimti nung tayimtsü amshia amakba nung nisung pongu asü, ta iba region indang governor-i ashi.

Ukraine den arütsü nungi kanga talangkabo mepilai amakba nung nisung 18 yiru ta ashir.

Social media nung video tem prokshiba nunga ambulance aika kanga sashia raksar aliba shopping centre ka kima anentena liasü.

Belgorod region nung air defence systems ajanga

Ukraine indang missile 14 khazüka yok, ta Russian ketdangsurtemi ashir.

Ministry of defence den kanga junga tesendaktep aliba Russian Zvezda TV ajanga ashiba agi, rocket kati shopping centre nung kongshi aser ka yimti indang sports stadium nung tsük.

Belgorod ya Ukraine den arütsü nungi mile 19 (kilometre 30) shi pilar lir.

Küm ana shi tejakdang nungi Russia-i tashiyim amshia Ukraine maka arudang Ukraine sepaitemi iba region

nung mapang shia amaker. December ita iba region nung drone aser rocket amshia amakba nung nisung 25 aser 100 yirua liasü, koba Belgorod nung azüdokshi tesashitiba liasü.

Yasünyg Russia-i Ukraine dak missiles 26 khaloktsü aser iba mapang Ukraine anüdoklen Kharkiv anasa Chuguyiv nung arishi küm 66 tain tetsür ka tepset aser aika yirua liasü.

Kasa mapang Ukraine anüdoklen Avdiivak jila nung rara tesashiba akumer. Ukraine sepaia kari iba jila ya

mashi mapang ka makdoktsü akok, kechiaser nok-nü aser injang-bomb agi kanga anünger, ta osangbener dang ashi.

US-i maneni Ukraine nem mitkar tsütsü teyari magütsütetba ajanga tongpang nung takoksa ajurur, ta Bresthostibarnü NATO Secretary General Jen Stoltenberg-i tekumdangtsü shia liasü.

Avdiivka ya tongtipang tesem ka lir, kechiaser ibai Russia-i amokbanga aliba Donetsk yimti leni aoba sungkum ka amai lir.

NO & PG 2024: Pencak Silat & Volleyball asaya tenzükogo



Dimapur, Tsüklai/February 15 (TYO): Nagaland Olympic & Paralympic Games 2024 Pencak Silat sentong tanü Immanuel Hall, Signal Basti, Dimapur nung tenzükoga, koba Dimapur Urban Council Chairmen Federation, tir Zasivikho Zakiesato-i moatsü. Iba sentong nung jembidang, tanübo saisapong ya pei jangraba ka dang masü saka profession ka kumogo, kong state telungzük nung dang masü national aser international jenjang nung tokteptsü maongka agütsür aser iba yangji takum nunga takok balala alir, ta Zasivikho-i ashi.

Saisapong nung yimya tajung ajak kasa tongtipang lir, saka Pencak Silat yagi international aser national jenjang nung takok bener arutsü aser ibaji ajanga asen temang structure ya asaya yimya den apeter ta ashi.

Sempet aliba lanurtem asoshi Nagaland Olympic Association kübok sapang agütsüba ajanga saisapong balala nung lanurtem ajungmesotsü, ta pai ashi. Tanü Pencak Silat ya aikati memetet alitsü, saka iba Olympic nung shilem agir temi nübürtem nem iba asaya indang metetdaksütsüla.

Ananü asayatsü aliba Nagaland Olympic & Paralympic Games 2024 Pencak Silat nung district trok nungi asayar 72-i shilem agitar. **Tetsür aser tebur volleyball asaya** 3 buba Nagaland Olympic and Paralympic Games 2024 Volleyball (Tetsür aser Tebur) asaya February 15, 2024 nü Volleyball Arena-D opposite of Nagaland Cricket Stadium Sovima, District Chumoukedima nung

tenzükogo. Iba asaya tenzükba sentong nung Advisor to the Chief Minister, Chairman IDAN aser Secretary General Nagaland Olympic Association, Abu Metha tesemdang tongti liasü.

Iba asaya tenzükba sentong nung jembidang, volleyball yagi asaya indang tatishitsü sayur, kechiaser volleyball ya ajaki meteta lir kinük-kisang ajaklen asayatsü akoker, ta Abu Metha-i ashi.

Olympic nung shilem agitsü aruba asayatem ajungshia jembiba mapang pai asayatem dang pei district indang ambassador ka-ka asütsü ayongzük aser asayar yimya tajung sayutsü ashi, kechiaser Nagaland nung Nagaland Olympic games ya asayamung tematiba lir. Metha-i maneni Olympic Association yariba atema

Nagaland Volleyball Association nem tenüngsang agüja liasü. NVA nungya timba taoba mapang asayatem aser coaches tem lir, shirnoki state nung volleyball asaya temaba jenjangi ajungketsü meranger, ta pai ashi. Iba sentong nung NVA tir N. Jacob Yanthan-i jembidang, Olympics aser Paralympic games ya temulungtetba, sportsmanship, yimya aser telungjem benjongba mapang lir aser iba sapang ya ajanga lenla balala nungi lanurtem adenshia tokteper aser kati ka ajungmesor, ta ashi.

Taküm iba asayamung ya ajanga lanurtem dak tanüla tajung aliba aser nübürtemi yariba sayutsü imlar, ta pai ashi. Paisa shilem agir ajunga dang yimya tajung nung kati ka akumtsübo asayatsü aser kati ka temaba jenjang nung ajungketsü ajungshia liasü. Paisa asayatem dang temeim agi tokteptsü aser Olympic aser Paralympic games ajanga sayuba ama telungjem nung asayar tanüla

nung shilem agitsü ayongzük liasü. Iba volleyball asayamung nungi asayar 20 shi shimteta ita ka atema coaching agütsütsü aser Northeast nung shilem agidaksütsü, koba March 2024 tashinung agitsü, ta Yanthan-i metetdaksü. 3 buba Nagaland Olympic and Paralympic Games 2024 Volleyball (Tetsür aser Tebur) ya Nagaland Volleyball Association ajanga Nagaland Olympic Association tawabangba kübok ayongzük aser Government of Nagaland ajanga sponsor asü. Iba asaya nung Longleng, Mokokchung, Wokha, Tuensang, Tseminyu, Noklak, Kohima, Peren, Mon, Dimapur, Nuiland, Shamator, Phek, Zunheboto, Kiphire aser Chumukidema district tem nungi shilem agir.

Iba sentong nung menden Viriekhonuo Keretsu liasü aser Wojanthung Ngullie, pastor, Lotha Baptist Church Diphupar-B ajanga sentong tenzükoga sarasadem.

BENDANGLI OSANG : Tapak 7 nungi...

PM candidate atema Imran Khan-i Omar...

"Anungji iba election anema linük tesem ajungalen longkak aitsü onoki telemtetba agiogo aser iba atema ni danga political party tem den ajuruteptsü," ta Qaiser-i ashi. Tasüngdangba ka langzüdang pai ashiba agi, PTI-i yariba candidate shirnokisa election nung takok nguogo, parnok manentsü aser assembly nung amentsü. Onoki anogo ka mesüra ana nung parliamentary session jazüksü ta PTI leniri ashi.

Kasa mapang taoba senator Barrister Mohammad Ali Saif-i ashiba agi, Imran-i Qaiser adianu Aqibullah Khan ya KP Assembly indang speaker asütsü shimogo. General elections dak sendakba nung US-i sangdong ka agütsüba atema Imran-i osang balaka shioka lir ta pai ashi. "US-i tensa ajak nung dictators tem yari mesüra ochimashi mapa inyakba lenirtem anir aru aser item nisungtem anir arua democracy mezüngmeshi ta onoki amanger," ta Barrister Saif-i ashi. "US-i tesüiba indang mürekteta Pakistan election nung ochimashi mapa inyakba nung tenük yoktsü maongka ka lir ta Imran Khan-i ashi aser linük puti otsü nung February 8 election ya tamajungtiba liasü," ta paisa nenshia ashi. Imran Khan temulung

melenshiba indang asüngdang dang, PTI tenzüksangi ashiba ya tawa State Department-i osangbener den jembidang election nung shilem agiba aser ochimashi mapa inyakba bushisüngdang asütsü ashiba atema telangzüba agütsüba lir, ta Barrister Saif-i ashi. "Iba ama tema tazütsü sangdong agütsütsü melena ochimashi mapa inyakba nung dena alirtem US-i ajungshitsüla ta onoki ashir," ta pai ashi. Election nung ochimashi mapa inyak ta tai tonglokja linük tesem balala nung longkak aitba tali tesashiba akumer, saka Balochistan nungi national aser provincial assembly menden nung takok anguba Pakistan Peoples Party (PPP) lenirtem aser candidate temi coalition sorkar ka kumtetsü ta sangdong. Tamakok anguba candidate aser parnok party temi institutions, ketdangsur aser candidate tem o tamajung amshia aitsüba ya kangasa tia maka lir ta ashi.

Balochistan province nung PPP-i menden 11 nung takok ngua parnok ya province nung single majority party lir ta ashir. Menden timba nung takok ngua lir asünung Balochistan nung sorkar ka kumtetsü temeden lir aser coalition sorkar ka kumtetsü asoshi danga party tem ajuruogo, ta PPP lenirtemi ashi.

Bajrang Punia-i UWW dang WFI nem tenokdangba agütsütsü ajungshia

New Delhi, Tsüklai/February 15 (Agencies): Brehostibarnü Olympic medallist Bajrang Punia-i world governing body UWW dang Wrestling Federation of India (WFI) nem tenokdangba tanaben agütsütsü ajungshia aser Sanjay Singh-i aniba telok tanaben aniokba ajanga wrestler tem maneni timtem nung yutsür ta ashi. United World Wrestling (UWW) ajanga WFI nem tenokdangba agüja aliba Mongulbarnü agien saka longkak aita aliba Punia, Sakshi Malik aser Vinesh Phogat nunger anema mapan tamajung meinyaktsü ta tezüluba nung agütsütsüla ta shia liasü. "Iba telemtetba yagi Indian wrestler tem maneni WFI züngsemtem ajanga amokmeren aser merenshitsü maongka agütsür," ta Punia-i züluba shiti nung shia liasü aser social media X nunga lemsatep. Mapang shidak nung election magiba yong UWW ajanga WFI ya August 23 nung suspend süja liasü. Tetsükdaksü balala ajuruba sülen WFI nung

election agi aser Sanjay Singh ya tir ka ama shim. "Yimya balala ajanga tim masüba mapa inyakba aser merenshiba anema Indian athletes tem nokdakba nungi nenoki yaritsü onok wrestler temi mepishir. Indian wrestler temi nenok dak teimla nung repranger." "India nung saisapong maparen shidak inyaktsü asoshi onoki mepishiba ama nenoki inyaktsü onoki imlar aser WFI anema nungdakba mera agitsü amanger," ta Punia-i shiti copy ka Sports Minister Anurag Thakur dangi yokba nung shia lir. Tokyo Games bronze medallist-i UWW dang Indian Sports Ministry ajanga taoba küm December 27 nü WFI suspend sütsü, kechiaser mapa agizüker anogo ishika tsüngta tim masüba mapa aika inyaka liasü," ta ashi. Suspend sütsüba ajanga Ministry of Youth Affairs and Sports-i wrestling inakyim ketdangtsütsü asoshi shilem tulu agia Ad Hoc Committee

denteta liasü. "Iba ama inyaksangshi liaka suspend sür aliba WFI züngsem temi maneni tapi agi telemtetba agia sports ministry nungi temelaba makai kasa lenir kübok saisapong maparen inyaka liasü," ta Punia-i ashi. "India tesem ajunga nung aliba wrestler temi Wrestling Federation of India inakyim nung tamang makai kumogo. Iba yongji MYAS ajanag mera tajung agia January 7, 2024 nü sangdong ka agütsü." "Iba sülenjia parnoki yimjak nung wrestler aser Ad Hoc Committee anema sangdong balala agüja liasü. Iba elected body ya tang tashi kasa nisungtem aser parnok den sendaktepa alirtemi anishir, shirnok anema ken o benoka lir aser MYAS-ia kasa tanagatetba nung suspend sütsü," ta ashi. Punia, Malik, aser Vinesh Phogat nungeri anir taoba WFI tekolakba Brij Bhushan Sharan Singh anema longkak aiter aser 'sexual harassment' atema pa aputsü akhanger.

BILEMDANGANG

"Sempet dang nungi tagütsür tali meimang."